



17. august 2009

UKA2009/103

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqummiuppara:

Atuarfik pillugu Inatsisartut peqqussutaat nr. 8, 21. maj 2002-meersup allanngortinneqarnissaa pillugu Atuarfitsialammi tuluit oqaasiisa atuartitsissutigineqartarnerat qallunaat oqaasiitulli 1. klassimiit aallartittalernissaat anguniarlugu Naalakkersuisut suli-niuteqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Tunngavilersuut:

§ 10. Nukarlerni atuartitsinerup imarai:

- 1) atuartitsissutit qanitariissut oqaatsit: *kalaallit qallunaallu oqaasii,*
 - 2) atuartitsissutit qanitariissut kulturi inuiaqatigiillu: *inuiaqatigiilerineq aamma upperisalerineq isumalioqqissaarnerlu,*
 - 3) atuartitsissutit qanitariissut matematikki pinngortitarlu: *matematikki pinngortitalerinerlu,*
 - 4) atuartitsissutit qanitariissut inuttut inerikkiartorneq kiisalu
 - 5) atuartitsissutit qanitariissut ilinniartitsissutissat sumiiffinni ataasiakkaani toqqagassat.
- Imm. 2. Oqaatsinik atuartitsinermut aammattaaq ilaassapput atuartut allamiut oqaasiinik piginnaasaannik inerisaaniarluni pilersitsiffiusumik sammisaqartitsineq.*

1)-imi Ima allanneqalissaaq:

§ 10. Nukarlerni atuartitsinerup imarai:

- 1) atuartitsissutit qanitariissut oqaatsit: **kalaallit, qallunaat tuluttuullu oqaasii,**
 - 2) atuartitsissutit qanitariissut kulturi inuiaqatigiillu: *inuiaqatigiilerineq aamma upperisalerineq isumalioqqissaarnerlu,*
 - 3) atuartitsissutit qanitariissut matematikki pinngortitarlu: *matematikki pinngortitalerinerlu,*
 - 4) atuartitsissutit qanitariissut inuttut inerikkiartorneq kiisalu
 - 5) atuartitsissutit qanitariissut ilinniartitsissutissat sumiiffinni ataasiakkaani toqqagassat.
- Imm. 2. Oqaatsinik atuartitsinermut aammattaaq ilaassapput atuartut allamiut oqaasiinik piginnaasaannik inerisaaniarluni pilersitsiffiusumik sammisaqartitsineq.*

Nunatsinni kalaallit oqaatsigut tassaapput pingaarnerpaat, qaqugorsuarmut ataqqillugit kinguaatsinnut ingerlatittuagassagut.

Danmarkimik naalagaaffeqateqarnitsinni qallunaat oqaasii oqaatsitta aappaattut atulersimavagut ilinniagaralugillu.

Tuluit oqaasii, nunarsuarmioqatitsinnut pingaarnerpaatut attaveqaataasut, oqaatsit pingajuattut ilinniagaraagut.

Danmarkilu naalagaaffeqatigiinnerput tunngavigalugu isumaqatigiissutillu malillugit ilinniart-orpassuit qallunaat nunaannut ilinniariartutik aallartarput, taamaattoq nunanut allanut ilinniartitaanikkut suleqateqarnerput qujanartumik sulii annertusiartorpoq.

Nunarsuarmi sumiikkaluaraanniluunniit ilinniartitaanikkut ilisimatusarnikkut allarpassuarti-gullu tuluit oqaasii annertunerpaamik aallaaviullutik atorneqartarput, qallunaalli oqaasii pif-finni ikittunnguani kisimik atorneqarsinnaapput.

Atorfinitsitsinikkut nunanit allanit nunatsinnut tikisitat qallunaat nunaanneersuunerusarput aamma naalagaaffeqatigiinnerput tunngavigalugu. Ukiunili aggersuni nunanit allaneersut tuluttut oqaaseqartut tikisinneqartarsinnaanerit ammaffiginerulertariaqarparput, qallunaat nu-naat kisiat isumalluutigiunnaarlugu.

Oqartoqartarpoq ilinniarniaraanni qallunaat oqaasiinik piginnaasaqarnissaq pisariaqartoq, Atuarfitsialammi ilinniartinnilu allani atuakkat atuartitsissutit ilinniartitsissutillu amerlasuut qallunaatuujunerat tunngavigalugu aamma qallunaat nunaannut ilinniarniaraanni qallunaa-tut oqalussinnaanissaq paasisinnaanissarluk pisariaqartutut oqaatigineqartarmat.

Nunarsuarmi atuakkat meeqqanut atuartitsissutit ilinniartunullu ilinniartitsissutit tuluttut allas-simasut siuarsimanerpaajupput aamma qallunaat nunaanniluunniit ilinniarniaraanni ilisimatus-arniaraanniluunniit tuluttut oqalussinnaanissaq paasisinnaanissarluk pingaaruteqarnerpaajuvoq ingammik ilisimatusarnikkut atuagarsornermi tuluit oqaasii annertunerpaamik atorneqartillu-git.

Inerisaaviup nittartagaani takuneqarsinnaapput 2004-mi atuartut soraarummeertut misilitsin-nerminni angusaat qanoq annertutiginersut, tuluttut oqaluttariarsornermi annertusisami atu-artut agguaqatigiissillugu 7,48 karaktererivaat, naliginnaasumilu agguaqatigiissillugu 5,66 taamaallaat karaktereqarlutik, annertusisami allattariarsornermi agguaqatigiissillugu 6,39 ka-rateriuvoq. Ataatsimut tuluttut agguaqatigiissillugu angusat naammaginangitsutut oqaatigisa-riaqarput, taamaammatt apeqqusertariaqalerparput, ilumut qallunaat oqaasii tuluit oqaasiinit pingaarnerusutut inissisimajuaannassanersut?

Inuiaqatigiit kalaallit nalilersueqqittariaqalerpugut. Hawaimi tusaamasakka malillugit me-eqquarpoq oqaatsinik assigiinngitsunik pingasunik atuiffiusumik, meeqqat taakku me-eqquarvimmiit annertuumik inersimaneruleraangamik angusarissaartartut oqaatigineqartar-poq, tamannalu assut soqutiginarpoq, uagut Atuarfitsialatsinnut taputartuussinnaanera eqqar-saatigalugu. Taamaammatt siunnersuutigissavara Atuarfitsialammi tuluit oqaasiisa atuartitsis-sutigineqartarnerat qallunaat oqaasiitulli 1. klassimiit aallartittalissasoq Naalakkersuisut angu-niassagaat.